




Պ Ա Տ Մ Ա — Բ Ա Ն Ա Ս Ի Ր Ա Կ Ա Ն

«ԱՌ ԱՆՁՆ ԻՒՐ» ԲԱՆԱՍՏԵՂԾՈՒԹՅՈՒՆԸ ԵՎ ՆՐԱ ՊԱՏՄՈՒԹՅՈՒՆԸ*

Տասնամյակներ առաջ «Առ անձն իւր» խորագրով, «Մնացեալ անձն իմ խղճալի» սկսվածքով անանուն բանաստեղծության ձեռագիր մի օրինակի վրա մեր ուշադրությունը հրավիրեց անվանի հայագետ, պատմաբան, ակադեմիկոս, Մատենադարանի արժանահիշատակ տնօրէն Լ. Ս. Խաչիկյանը: Այդ բանաստեղծությունը մասնակիորէն օգտագործելով «Պետրոս Ղափանցի» աշխատության մէջ (տպագրված 1969 թ.) մենք մեր խորին շնորհակալությունը հայտնեցինք գիտնականին, որի բազում մտահոգություններից մեկն էր՝ իր աշխատակիցներին, և առհասարակ Մատենադարանին առընչվող մասնագետներին օգնել իր խորհուրդներով, ուղղություն տալ նրանց, ձեռագրական նյութեր մատնացույց անել և այլն:

Արդ, ի՞նչ է ներկայացնում այդ բանաստեղծությունը, ո՛վ է նրա հեղինակը, ե՛րբ է ստեղծվել այն, որո՞նք են նրա պատմության հետաքրքրաշարժ կետերը, և վերջապէս՝ ինչ տեղ ունի այն հայոց վերանորոգվող գրական բանաստեղծության պատմության մէջ:

Երեսունութ քառատող տներից բաղկացած, մեկ հատածով, 7—8 վանկանի կարճ, թեթևաշունչ տողերով, փոփոխվող վերջնահանգերով և կրկնակով, պարզ գրաբարային հյուսվածքով, բարբառային տարրերով համեմված ժողովրդաշունչ մի բանաստեղծություն է այն, որը մեծ տարածում է գտել ժամանակին և իր հետքը թողել 18—19-րդ դարերի գրական ստեղծագործական մտքի վրա:

Մենացեալ անձն իմ խղճալի,
Ի բազմութեանց լեալ ի բաց,
Յումմէ՞ յուսաս զբարութիւն՝
Բարեպաշտօն չի մընաց:

* Ընթերցվել է Մեսրոպ Մաշտոցի անվան Մատենադարանի գիտական նստաշրջանում, որը նվիրված էր ակադեմիկոս Լևոն Խաչիկյանի ծննդյան 70-րդ տարեդարձին:

Անձն իր անձին անձնատաճու,
 Անձին խնդրէ ամէն այր,
 Յումմէ սպասես առնուլ զխորհուրդ
 Խորհրդական չի մընաց:

Համայնից ջանքն՝ զներկայէս՝
 Վայելչացի վայելչմամբ,
 Իսկ վասն աւուրց հանդերձելոց
 Հոգացու այր չի մընաց:

Ի թշնամեաց վիրաւորեալ,
 Զոք կիսամահ երերէի
 Դարման վիրաց մեծ, գթութեամբ՝
 Սամարացի չի մընաց¹:

«Առ անձն իր» բանաստեղծությունը գրվել է 1764 թվականին և մեզ է հասել ձեռագիր և տպագիր բազմաթիվ օրինակներով: Ձեռագրերի մի զգալի մասում երգը անանուն է, անհեղինակ: Սակայն աղբյուրագիտական մանրագնին քննությունը ցույց տվեց, որ «Առ անձն իր» բանաստեղծության հեղինակը 18-րդ դարի կրթական, լուսավորական շարժման նշանավոր գործիչ, Պոլսի Պատրիարք, աստվածաբան, փիլիսոփա, բանաստեղծ, նարեկագետ, Նարեկացու «Մատենան ողբերգութեան» երկի հմուտ մեկնիչ, բանաստեղծ ու զրուցագիր Հակոբ Նալյանն է (1706—1764): «Ոտանաւոր գեղեցիկ և յոյժ ազդու շարադրեալ ի Յակոբ վարդապետէ, խոր ծերունի պատրիարքէ Կոստանդնուպօլսոյ ի վերջին ժամանակիս կենաց իւրոյ ի մերձ ի մահն»²:

Նալյանի անունը հիշատակվում է նաև բանաստեղծության վերջում.

Ողբալի Յակոբ, վշտալի պատրեայք,
 Վտարանդեալ ի կենօք,
 Տարագիր և ցաւօք շրջիս՝
 Մխիթարօղ այր չի մընաց:

Քրտմամբ կարի աշխատեցար,
 Յաչաց լուսոյ պակասեցար,
 Երկար ամօք վաստակեցար՝
 Երկանցդ գիտցօղ այր մի մընաց:

«Առ անձն իր» բանաստեղծության և՛ խորագրում, և՛ վերջին քառատողերում կան Նալյանին վերաբերող կենսագրական հավաստի փաստեր, տեղեկություններ, որոնք այլևս ոչ մի կասկած չեն հարուցում ստեղծագործության հեղինակի շուրջ: Գուցե կարելի կլիներ մտածել, թե խորագիրը ստեղծել են Նալյանի կյանքին քաջատեղյակ, ժամանակակից գրիչները՝ ելնելով նաև բանաստեղծության ընդհանուր տրամադրությունից: Սակայն իրականությունը այլ բան է թելադրում: Նալյանը եղել է թույլ առողջության

¹ Մատենադարան, ձեռ. № 2696, թերթ 2ա—բ:

² Նույն տեղում, թերթ 2ա:

տեր, վախճանվել է տևական ծանր հիվանդությունից հետո, հյուծախտից, 58 տարեկան հասակում: Ժողովրդի նվիրյալը մեծ կամքով ու արիությամբ ղեկավարել, առաջ է վարել ողջ արևմտահայության հոգևոր, ազգային կյանքը և միաժամանակ ստեղծագործել՝ մինչև վերջին շունչը, ու մահվան անկողնում գրել բանաստեղծական իր կտակը: «Առ անձն իւր» բանաստեղծության մեջ միահյուսված են ազգի և մահասարսուռ հիվանդության ցավերով տառապող ազգային մեծ գործչի վիշտն ու բողոքը.

Արդ ամենայն գլուխ ի ցաւ,
Եւ ամենայն սիրտ ի հագս,
Յոտից մինչև ի ծայրս գագաթան,
Առողջութիւն չի մընաց³:

«Առ անձն իւր» բանաստեղծությունը ուշագրավ է նաև ձևի և բովանդակության կոտ ներդաշնակությամբ, հյուսվածքով: Նրանում ծայրից-ծայր իշխում է իրական կյանքի քննադատական ոգին: Նրա հեղինակը՝ Հակոբ Նալյան գիտնականն ու հոգևոր հովիվը, հակադրվում է կյանքի սխալ ընթացքին, հակադրվում դարին, իր ժամանակին, հետևողականորեն, առարկայական, իրական, քննական (ո՛չ այլաբանական, ո՛չ տարապայման) եղանակներով, ժողովրդի մտահայացությամբ, ժողովրդական աշխարհընկալման արվեստով: Երգի գլխավոր հերոսը բանաստեղծն է՝ իր զգայուն սրտով, խորապես մարդկային և կոտ անհատականությամբ: Նրան դեմ-հանդիման կանգնում է ժամանակակից հասարակայնությունը՝ իր բազմասեռ ներկայացուցիչներով:

Ամեն քառատողի վերջում կրկնվող «չի մընաց»-ներով Հակոբ Նալյանը ներկայացնում է ողջ 18-րդ դարը, հայոց ներքին և արտաքին, համընդհանուր և ազգային կյանքի մութ և մռայլ կողմերը՝ արդեն խորապես շեշտավորված դասային հասարակության ներքին պայքարը, հակամարտությունները.

Մեծամեծաց զանանկս կեղեքել,
Փոքունց զմեծամեծն ըմպահակել,
Մինն անգութ, մինն՝ անհլու՝
Ծահածութիւն չի մընաց:

Համադամիւք փարթամ բտեալ,
Ուտել, ըմպել ի խրախճան,
Իսկ կարօտեալ Ղազարոսին՝
Փշրանք հացի չի մընաց:

Ընդհանուր ապականության մեջ կերպարանավորվում են հասարակության բոլոր շերտերի ներկայացուցիչները, բնութագրվում նրանք առանձին-առանձին՝ ընկշողները, տնանկները, կաշառակերները, կեղծարարները, անգութ մեծահարուստները, խոշոր վաճառականները՝ ժողովրդի արյունը քամող «ուտիչ» «ցեցերը».

³ Նույն տեղում, թերթ 4ա:

Համայն վաճառք խարդախամածք,
 Չափ մեծ և փոքր թիրեալք,
 Մինչ իկշորորդս, և ի կշիռս՝
 Արդարութիւն չի մընաց⁴:

Վաճառականք՝ ճիրանաւորք,
 Ի դաւելոյն գիտացելք,
 Եւ ի վաճառս զինարանաց՝
 Անջուր գինի չի մընաց:

Ոմն ի վաճառ, ոմն, ի գնել
 Կամին ածել հեշտութեամբ,
 Յարքայութեան կոչն հարսանեաց՝
 Գնացող այր չի մընաց:

Սուտն ու կեղծիքը համակել է բոլորին, ամենուրեք իշխում է խաբէությունը, քծնանքը, ստորաքարշությունը, կամայականությունը, կաշառակերությունը, չկան գործող օրենքներ, չկան արդար դատ ու դատաստան, ողբում է Պոլսի Պատրիարք նարեկագետ-բանաստեղծը.

Իսպառ բարձեալ են իրաւունք,
 Ընդ նոսին սուտս տարածեալք,
 Առ մեծամեծս և առ ստրուկս՝
 Ծշմարտութիւն չի մընաց:

Ամենայն ոք ջանայ պատրել,
 Զօճական բարս ունելով,
 Վասն այն ի սիրտս և ի լեզուս՝
 Ստուգութիւն չի մընաց:

Առաջնորդք ի քաղաքաց
 Աղուեսու բարս ստացեալք,
 Շողոքորթօղք և կեղծաւօրք՝
 Ողղադատ այր չի մընաց⁵:

Հակոբ Նալչանը արտի խորունկ ցավով դատապարտում է նաև հոգևոր, եկեղեցական, «աստուածարեալ» գործիչներին, նյութապաշտ, ընչաքաղց քահանաներին, եպիսկոպոսներին, դավանաբանական տարբեր թևերի պատկանող խառնակիչներին: Դրանք, այդ կեղծ հրբակենցաղները, մեղսակից են դառնում «ազգի արյունը ծծող ցեցերին», «ուտիչներին».

Ի վարդապետս եկեղեցոյ,
 Որք են հովիւք ոչխարաց,
 Վասն ազատման թիրեմ զբանս,
 Ողղութիւն չի մընաց:

⁴ Ձեռ. № 2695. թերթ 4ա—բ:

⁵ Ձեռ. № 2696, թերթ 4ա:

Եպիսկոպոսք սիմոնականք,
Աներկիւղք և անաստուածք,
Զանարժանս յառաջ կոչէն՝
Բարեաց ընտրող մարդ չի մընաց:

Քահանայքն են սուտապասք,
Լըպրշաղէմք, լըրբենիք,
Անկեալ յարբունս ի գինարանս՝
Ան և երկիւղ չի մընաց:

Նուիրակունք՝ անօրէնք,
Ուղարկողքն՝ անիրաք,
Տգրկապէս ծնէն զարիւնս՝
Զազգիս խնայող մարդ չի մընաց⁶:

Ընդհանուր և ազգային, արտաքին և ներքին, հասարակական, քաղաքական, դավանաբանական վեճերին ու հակամարտություններին ուղեկցում են ազգամիջյան կոիվներ, պատերազմներ, որոնց հաջորդում են՝ սով, աղքատություն, համաճարակներ: Եվ այդ արհավիրքների դեմ ժողովրդին միաբանող քաջ ու աներեր հովիվներ, առաջնորդներ: «Անհաղթ Դավիթներ չկան», չեն ծնվում, ողբում է ժողովրդասեր, իրապաշտ բանաստեղծը.

Հրահուսակք յորդորեալ, աւունք քակեալ,
Ծէնք անողորմ խանգարեալ,
Սմբակակոխ սահման եղեալ,
Եւ այս ցաւոց դեղ չի մընաց:

Սրածութիւնք, սով և ժանտախտ,
Արդեն զմեզ պաշարեալ,
Քառեղանակք խանգարեալք՝
Անդորրութիւն չի մընաց:

Հերձուածողաց ժամուն գտեալ,
Կարի յոյժ կատաղեցան,
Եւ հարկանօղ զնակատ նոցին՝
Դաղթող Դաւիթ չի կընաց⁷:

«Առ անձն իր» բանաստեղծությունը իր թեթևաշունչ, պարզ հուսվածքի, իր առողջ, հետևողական քննադատական եղանակի մեջ ունի նաև ներքին մի տխուր շեշտ, թախծոտ մի շունչ, որ համակում է ընթերցողին. վերջինս միշտ զգում է բանաստեղծի ապրած ցավը, ժողովրդի, ազգի անկյալ վեճերի համար, նրա մտահոգությունը, երկյուղը, նրա տագնապը ազգի նակատագրի նկատմամբ... Անարդարությունների, հերձվածքողների դեմ ժողովրդասեր երգչի ընդվզումները, բողոքը ի վերջո լցնում են նրա համ-

⁶ Նույն տեղում, թերթ 3ա:

⁷ Նույն տեղում, թերթ 2բ:

բերության բաժակը, նրան մի պահ թվում է, թե ահա եկել է աշխարհի վերջը, և կործանվելու է ամեն ինչ:

Ո՞ր իցես նեո, եկ, երևալ,
Զի վախճանն է աշխարհի,
Թէ հարցանես գալստեան քո՝
Գուշակ, նըշմար չի մընաց⁸:

Սակայն «Առ անձն իր» բանաստեղծությունը ամբողջությամբ հասարակությանը ապաքինելու, բարեփոխելու խիզախ քննադատանք է, չափաբերված ճշմարիտ ուղեցույց. այն մարդու ինքնահաստատման, կատարելության խորին խորհուրդ ունի իր մեջ: Այդ շնչով են համակված Նալյան գիտնականի, աստվածաբան-փիլիսոփայի, պատմագետի, Նարեկագետի և բանաստեղծի բոլոր լավագույն գործերը, նույնիսկ «Ունայնություն կենցաղոյս» կրոնա-փիլիսոփայական բանաստեղծությունը:

Կյանքն է մարդոյ իբրու երազ,
Եւ տեսանօղն առնէ տնազ.
Ոչ տայ յագուրդ թէւն նուազ,
Այլ սորի միշտ եբրու աւազ...

Մարդոյ կեանքն է դիւրանց մըրրիկ,
Ներհակ բախմամբ գէտ փոթորիկ,
Վայրկեան ժամու տեւէ փոքրիկ,
Անյայտ լինի յետ այնորիկ:

Յայսմիկ կիտոջ յար ջանալի,
Զյափտենականն ըստանալի.
Որոյ երկնէ թէպէտ լալի,
Բայց վայելումն յոյժ բերկրալի
Գործով բարեաց սերմանելի,
Զուր արտասուաց ոռոգելի...

Մեր օրերի մատենագետ Գ. Բամպուքճյանը Նալյանի այս բանաստեղծությունը գնահատում է այսպես. «Գեղեցիկ է ու ազդեցիկ խորհրդական մըն է, որուն պարունակությունը կարծե նկատի ունենալ մեր կյանքի ողիղ ճամփեն չխոտորելու համար»¹⁰: Հիրավի, ունայնության փիլիսոփայությունը, որ խորն նստվածք ունի, ոչ միայն Նալյանի, այլև 18-րդ դարի ողջ դասական բանաստեղծության մեջ կյանքը մերժելու, մահը, անշարժությունը խրախուսելու նպատակներ չունի, իրականության դեմ մարդու ունեցած դժգոհությունը ծնում է ունայնության գաղափարը:

Հակոբ Նալյանը չի բարձրացնում հոգու անմահության կամ փրկության գաղափարը նեղ մտապատրանքով, այլ արթնացնում է մարդու մեջ քնած բանականության ձայնը, սթափեցնում մարդու միտքն ու հոգին: Կյան-

⁸ Նույն տեղում, թերթ 4ա:

⁹ Զեռ. № 1015, թերթ 168ա:

¹⁰ Գ. Բամպուքճյան, Յակոբ Պատրիարք Նալեան... Ստամբուլ, 1981, էջ 73—74:

քի ունայնության գաղափարը (18-րդ դարի բանաստեղծության մեջ) ի վերջո հանգում է երկնային և երկրային հասկացությունների համերաշխության գաղափարին: Դա սկսվում է այն պահից, երբ բանաստեղծությունը ունայնության հարցը քննում է մարդկային փոխհարաբերությունների, հասարակական հակոտնյա երևույթների, բախումների անմիջական առնչությամբ. խորենացիական անհաղթյան, նարեկյան այն ճշմարիտ գաղափարախոսությամբ, համաձայն որի մարդն է կենդանական աշխարհի բանական էակը, տիեզերքի զարդը, և նա պետք է չարիքի դեմ պայքարի բարության, առաքինությամբ և խիզախությամբ, պայքարի մինչև վերջ...

Լեր անփոփոխ միշտ ի բարին, զէդ արև,
Մի՛ ըստ լուսնոյ փոփոխական, ստորև:

* * *

Աշխատութեամբ երկրագործեաց,
դարմանք մարմնոյն պատուաստին,
Ապաշխարեալ թէ ախորժիս,
պիտոյք հոգւոյն լնանի¹¹:

* * *

Երածիշտ լէր դու ըստ հոգւոյ,
Ներդաշնակցեալ յար ընդ մարմնոյ,
Հոգիդ երգօղ ըստ արտուտոյ,
Մարմինդ քնար բարի գործոյ...

Հակոբ Նալյանի «Առ անձն իւր» երկում, ինչպես տեսանք, իշխում է քննադատական ոգին...: Այդ ոգու մեջ ահա ներքնապես առկայծում են բարոյական աստվածաբանության և «Մատենան ողբերգութեան» իմացաբանության ցոլքեր: Նարեկացին մեկնիչ-բանաստեղծ Հակոբ Նալյանին պարզեւ է սթափումի, զգաստության, ներշնչանքի ուժ: Նալյանը, իբրև ճշմարիտ բանական, մեկնելով «Նարեկը», արթնանում է նիրհից և իր հայացքը բարոյական աստվածաբանության ընդերքից սկեռում դեպի իրական, առարկայական աշխարհը, դեպի մարդկային կյանքը և արտացոլում այն, ինչպես որ կա...

Յոր աղօթիցըն գեղմանէ
Յորողընդոստ հառաշմանէ,
Սուրբ հըսկողին օգնեցմանէ,
Եւ ես զարթեայ ի նիրհմանէ¹²,—

գրում է Հակոբ Նալյանը «Նարեկի» իր մեկնության մեջ: Հիրավի, թվում է, թե «Մատենան ողբերգութեան» երկի քննադատական աներևակայելի ուժի, նրա կախարդանքի զորությամբ Հակոբ Նալյանը մահվան անկողնում, իր

¹¹ Ձեռ. № 6909, թերթ 48ա:

¹² Ձեռ. № 1016, թերթ 186բ, ձեռ. № 6309, թերթ 48ա:

վերջին շնչի հետ է գրել «Առ անձն իւր» բանաստեղծությունը: Այս առումով Նալյանի վրա առավել քան խորը ներգործություն կարող էր ունեցած լինել «Մատենի» ԶԸ և Ղ գլուխները: Այստեղ է, որ հանճարեղ բանաստեղծի ընդհանրացումները քանդում են դարի իրավա-հասարակական պատկերները, բացահայտում «ուտիչ ցեցերի» (Հ. Նալյան), «կցորդութիւնք կերչացն», «գաղտնաձածուկ որոգայթները սատանայական», «մերկացնում չարի խարդավանքները», բացում «նենգողի» ծողակներն անտես» (Գ. Նարեկացի): Այստեղ է, որ Նարեկացին իր հանճարի աներևակայելի առկայծումներով նգովում, անեծք է թափում դավադիրների, բռնակալների, մահ որսողների գլխին.

... Լուծցին որոգայթն գաղտնաձածուկք սատանայականք,
Կապտեցին մեքենայքն, վատնեցին գայթակղութիւնքն,
Խայտառակեցին խաղբիցն դրութիւնք,
Յայտնեցին երեսոյթ որսոյն,
Տոչորեցին որոնմանցն բոյսք,
Նգովեցին բռնաւորին շարաբանութիւնք,
Կտրեցին՝ լար խաբեութեան ի մահորսողին.
Պարսեցին պատրողին բանասարկութիւնք.
Անկցին սուտերք մահութերին,
Սուգեցին սադրողին պատրաստութիւնք,
Արձակեցին տոռունք տագնապողին,
Այլալեցին սուտ կերպարանք կեղծաւորին,
Սատակեցին խորխտականացն խիստ յարձակմունք,
Յրուեցին կցորդութիւնք կերչացն,
Բաժանեցին ազինք աւազակացն,
Քայքայեցին բոյլք բարբարոսացն,
Քանդեցին ամրոցք ապստամբողացն,
Արգիլեցին ամպրոպք յանդգնելոցն...¹³:

Անշուշտ ժամանակներն այլ են, հանգամանքները՝ այլ. բռնացողների, խաբեբանների, զրպարտիչների, երեսպաշտների, ավազակների, բարբարոսների, կեղծ դրոշակագիրների գործունեության միջավայրը, պայմանները փոխվում են, բայց նրանք հար և նման են իբրև ժողովրդի, հասարակության «ուտիչ ցեցեր», իբրև ազգի միաբանության, առաջադիմության հակառակորդներ: Նարեկացին անհուն վրեժով և անելությանբ ազդարարում է հասարակությունը նրանցից մաքրելու իր բուռն տենչանքը, կամքը, իր բաղձանքը: Իսկ Նարեկացուց ութ դար հետո Հակոբ Նալյանը հայտնում է ներսանց՝ նույն այդ «ուտիչ ցեցերի» ուժերի ամրապնդման տխուր փաստը, ներկայացնում նրանց գործընթացը...:

Անսպասելի չէ... Նալյանը պետք է դառնար Գրիգոր Նարեկացուն նվիրված բանաստեղծությունների ամենամեծ շարքի հեղինակը ոչ միայն 18-րդ դարում, այլև ողջ միջնադարում: Նալյանի «Առ անձն իւր» բանաստեղծության և նրա մեկնողական և այլ կարգի աշխատություններում տեղ գտած քննադատական բանաստեղծությունների մեջ իր դերն ունի Նարեկա-

¹³ Գրիգոր Նարեկացի, Մատենան ողբերգութեան, աշխատասիրությամբ՝ Պ. Մ. Խաչատրյանի, Ա. Ա. Ղազինյանի, Երևան. 1985, էջ 604—605 (Բան «Ղ»):

ցին: Նարեկացին խորապես ազդել է Նալյանի բանաստեղծական ժառանգության վրա՝ իր մտահայեցողությամբ, իր աշխարհաճանաչման աներևակայելի խորությամբ, իր հանճարեղ արվեստով: Նալյանը իբրև խոշոր աստվածաբան, փիլիսոփա, իբրև բացառիկ նարեկագետ և ժողովրդասեր գործիչ, միաժամանակ «նիրհուն չափական» (ինչպես գնահատում են նրա ժամանակակիցները), բարոյական աստվածաբանության, Աստվծաշնչի արդարասիրական հիմունքների, խաչված Քրիստոսի, մարգարեների, սրբերի, առաքյալների ճշմարտության, արդարության համար նրանց զոհաբերությունների ողջ պատմության խորհուրդներով, նրանց առաջավոր գաղափարների դիրքերից ներթափանցում է իրական, առարկայական աշխարհը, մարդկային հասարակական կյանքը, արտացոլում այդ բոլորը բանաստեղծության մեջ: Ելակետը երկուսի մոտ էլ քրիստոնեական մարդասիրության չափերն են, բարոյական աստվածաբանությունը: «Ի հայս պարտեզ թէ մըտանես», «Դիր՝ առաջի քո զայն ատեան», «Մո՛ւտ ի սենեակ սիրոյ սրբոյս Գրիգորի», «Երրորդութեան մի տէրութեան» և այլ տաղերով Նալյանը բացորոշում է Նարեկացու «Մատենի» մարդասիրության անհուն տարածքն ու խորությունը և թախանձում ընթերցողին հետամուտ լինելու, հասկանալու «Մատենի» աներևակայելի արվեստի խորին խորհուրդները:

Դի՛ր առաջի քո այն ատեան,
Յոր Տէրտողոսըն քաջաբան,
Եւ Սաղօմօն որդի Դարթեան,
Լինին համերբ, անխօսական:

Անդ Օգոստոս հանրից արքայն,
Լինի աղքատ ճանընչական,
Անդ զառիծու ուժն ունական,
Ի նապաստակ երկշոտական:

Անդ Կըրասոս փարթամ արքայն,
Զէտ Սանդիտոռն է մերկական,
Միայն հաւատն և բարոքկեան,
Ունդ են վաճառք յոյժ շահեկան:

Զանա որքան ես յայսմիկ կեան,
Գանձել քեզ գանձ անմահական,
Զի անդ և կոյսքն իմաստնական,
Հազի գըտանեն գիղ բաւական¹⁴:

Նալյանն այս բանաստեղծությամբ է ավարտում Նարեկացու «Մատենի» քննական մեկնության 79-րդ գլուխը, որ ամենաընդարձակ և մանրագնին մեկնություններից մեկն է, և այստեղ է, որ նա Նարեկացուն վեր է դասում աշխարհի բոլոր իմաստուններից, թագավորներից, իշխաններից: Նարեկացու հանճարի առջև «համբանում է Սողոմոն իմաստունը», իսկ առյուծը դառնում է երկշոտ նապաստակ»: Ըստ Նալյանի, մարդկային միտքը

¹⁴ Յակոբ Նալեան, Գիրք մեկնութեան աղօթից..., Պոլիս, 1745, էջ 608:

անկարող է լիապես հասկանալ, ըմբռնել Նարեկացու «Մատենանի» մեծությունը, մտնելու նրա անհուն խորքերը, և որ ինքը ևս անգոր է եղել նրա ոսկյա գանձարանին արժանավայել մեկնություն անել, և որ իր խոսքը նրա ադամանդյա դրյակի համար խեցյա մի դուռ եղավ և ոչինչ ավելի:

Թէպէտ սրբոյս բանիցն ոսկեայ
 Լուծումն ետու զէտ պըղնձեայ,
 Կամ դըղեկին ադամանդեայ,
 Դուռն եդի՝ իբրու խեցեայ:

19—20-րդ դարերի նարեկացիագետներից շատերը իբրև բնաբան օգտագործում են Նալյանի այս հանճարեղ քառատողը:

Նալյանը բազում հոգսերի մեջ թաղված, վատառողջ ու թույլ, զոր ու գիշեր զբաղվում է Նարեկացու «Մատենանի» և այլ տաղերի մեկնության ծանր ու դժվարին աշխատանքով:

Թէև ունիմ զայլ ինչ կարօտ,
 Են առ այս գործ կարի աղօտ,
 Զանամ ի ցայգ և յառաւօտ,
 Հանել և զայնս իբր ի յարօտ¹⁵:

Նալյանի քնարը լիապես համախոս է 18-րդ դարի հայոց նոր և ընդհանուր, վերանորոգվող գրական շարժման գաղափարախոսությանը: Ո՛չ միայն այդ. Նալյանն իր գրական ողջ ժառանգությամբ, իր տարաստիճան՝ բարդ, միջին պարզությամբ և պարզ, բարեհնչուն գրաբար երկերով, իր նոր աշխարհաբար գրական հայերենով հյուսված տարատեսակ գործերով, ինչպես նաև թրքախոս հայությանը վերջնական ձուլումից ետ պահելու նպատակով գրած հայատառ թուրքերեն բազմատեսակ ստեղծագործություններով մեծապես արձագանքում է 18-րդ դարում զարգացող հայոց լեզվաշինարարական տեսական և գործնական պայքարին և Մխիթար Սեբաստացու, Պաղտասար Դպրի, Պետրոս Դափանցու և այլ նշանավոր գործիչների հետ միասին հարթում աշխարհաբար գրականության զարգացման ճանապարհը: Նրա «Առ անձն իւր» բանաստեղծությունը գրական, եզրափակիչ այն կոթողն է, որ լուսավորում է նրա անցած գրական ստեղծագործական վիթխարի ճանապարհը և համոզում ընթերցողին, թե Նալյանը, Նարեկագետը, Պոլսի՝ 18-րդ դարի կրթական-լուսավորական շարժման առաջամարտիկը այն գործիչը չէ, որ դուրս մնա հայոց գրականության պատմության պարբերական շարադրանքից: Այսօրվա ընթերցողը գրեթե չի ճանաչում նրան, բայց 18—19-րդ դարերում (այժմ նաև Սփյուռքում) ճանաչում են ...

Այրն այն հմուտ և խոհական,
 Ծանօթ գրեանց կենսունական,
 Այլ և տառից արտաբնական,
 Տիրաշնորհ գերընտրական:

¹⁵ Նույն տեղում, էջ 720:

Տաղն յօրինեաց տաղի կըշռական,
Յամէն համարի վերջըն աւարտման,
Խորին իմացմամբ նիւթով պարզական
Յակոբ պատրիարգը ներհուն չափաբան¹⁶,—

գրում են 18-րդ դարի մտավորական գործիչները՝ Ծաղիկ Աստվածատուրը և Եսայի Կոստանդնուպոլսեցին:

Նիրհուն չափաբանի առավել ժողովրդականացած երգը, ինչպես նկատեցինք, «Առ անձն իւր» բանաստեղծությունն է: Դժվար չէ նկատել, որ Հակոբ Նալբանի «Առ անձն իւր» բանաստեղծությունն իր քննադատական կենսաշունչ արվեստով համահնչյուն է նաև մեր այսօրվա կյանքին: 18—19-րդ դարերի մի շարք գործիչներ այդ բանաստեղծությամբ ներշնչված գրել են երգեր: 18-րդ դարի վերջերի և 19-րդ դարի սկզբների բանաստեղծ, Էջմիածնի միաբան Ահարոն վարդապետը Նալբանի «Առ անձն իւր» բանաստեղծության նմանությամբ գրում է մի ընդարձակ բանաստեղծություն՝ «Ողբ Ահարոն վարդապետէ ի դիմաց անձին իւրոյ ոգեալ» խորագրով, ուր ողբով և հուսաբեկ զեղումներով քննում է կյանքի չարն ու բարին, իր հոգու խռովքը հայտնում աշխարհին, մարդկանց, ամենքին և խաղաղություն տենչում՝ հավիտենական հանգստության մեջ:

Արի, ողբա անձն իմ գերի,
Փութա, գնայ աշխարէս,
Մի յապաղիր, թշուառելի,
Կեանք ողբալոյդ ո՛չ մնաց:

Հանդերձ քոյին գործով կոչէ,
Իշխան ատուր կենաց քոց,
Դարձիր հանգիստ յայս կենցաղոյս,
Սէր կատարեալ ոչ մնաց¹⁷:

Հակոբ Նալբանի «Առ անձն իւր» բանաստեղծության շուրջ առավել ուշագրավ մի պատմություն է ստեղծվել 19-րդ դարի սկզբներին: Նշանավոր գիտնական Մարգար Խոջենց Զմյուռնացին Պետերբուրգում 1807-ին Հակոբ Նալբանի բանաստեղծության նմանությամբ (հանգով, չափով, առանձին բառերի ու տողերի կրկնությամբ) հորինում է մի նոր ընդարձակ՝ 30 քառատողերից բաղկացած երգ. «Այս չափաբուետական քերթուածքը,— գրում է հրատարակիչ Գրիգոր քահանա Գրիգորյանցը,— տարածվեցավ ամենայն ուրեք և ամենեցունց ընկալեալ եղև սիրով և գովութեամբ մինչև ե՛հաս ի Տփղիս»: Սերովբե վարժապետ Պատկանյանը կարդալով այն, հույժ հավանում է և տրամադրվում պատասխանել նրան ... և ահա գրում է Մարգար Խոջենցի վերոհիշյալ բանաստեղծությունը՝ հակառակ պնդումներով, պարողիաշով ... և «չմնացը» «մնաց» կրկնակներով, հուսահատական տրամադրություններին պատասխանում լավատեսությամբ: Հակոբ Նալբանի՝

¹⁶ Ձեռ. № 1015, թերթ. 124ա, ձեռ. № 1014, 960ա:

¹⁷ Ձեռ. № 2696, թերթ 56ա:

Ազգ ի վերայ ազգին դիմեալք,
 Ահեղ գումարք յանախեալք,
 Ամէն կուսէ մարդք, առհավիրք,
 Խաղաղութիւն չի մնաց,—

տողերի փոխարէն Մարգար Խոջենցը գրում է.

Ազգ ի վերայ ազգք դիմեալ
 Գունտք զորաց յանախ կուտեալ,
 Յամէն կողմանց մարդ արհաւրաց,
 Խաղաղասէր տէր չմնաց:

Իսկ Սերովբէ վարժապետ Պատկանյանը պատասխանում է.

Արդ ամենայն կատարվեցաւ,
 Աշխարհն համայն սասանեցաւ,
 Բայց, արդ սփռիչ խաղաղութեան,
 Ռուսաց մեծ կայսրն մնաց ...¹⁸

Դիմադրողական, մաքառողական պայքարի մեջ ազգը ոչ թե կորչում, ոչնչանում է, այլ աճում, բազմանում,—գրում է հրապարակախոս-բանաստեղծ Հակոբ Ծահամիրյանը՝ աչքի առաջ ունենալով ռուս ժողովրդի փորձը, ազգ, որ աներևակայելի տոկունությամբ և խիզախությամբ կանգնելով ահեղ թշնամիների դեմ-հանդիման, հաստատեց իր ազատությունը, բարգավաճեց, զորացավ «ի նորումս քան զամենայն»: 18-րդ դարի բանաստեղծության մեջ հնչում է ահա քաղաքական, գաղափարական այս նոր հրահանգը, լուսավորչալ ազգերին՝ Եվրոպային, Ռուսաստանին, Անգլիային, Իսպանիային, հետևելու «մերազնյա համբակաց» կրթելու, լուսավորելու նոր կոչը: Նալյանն իր բազմաճյուղ, վիթխարի գրական ժառանգությամբ ինքնաքննադատանքի սուր արվեստով օգնում է այդ գաղափարների իրականացմանը:

ՇՈՒՇԱՆԻԿ ՆԱԶԱՐՅԱՆ

Բանասիրական գիտ. դոկտոր, գիտության
 վաստակավոր գործիչ

¹⁸ Երգը Սերովբէ վարժապետի Պատկանեան, Տիֆլիս, 1857, էջ 89: